

豫

章

焚

書

第五冊

天

年

笑

書

卷之五

丁卯冬月
于幸昌復廬

綱目續編

彙覽

欽定四庫全書總目卷四十七 史部 編年類

綱目續麟二十卷校正凡例一卷附錄一卷彙覽

三卷

江西巡撫
採進本

明張自勲撰自勲字卓菴南昌人是編成於崇

禎癸未首爲校正凡例一卷列朱子凡例與劉

友益書法凡例而各著所疑次爲附錄一卷備

列朱子論綱目手書十二篇及李方子綱目後

序王柏書綱目大全後徐昭文綱目考證序證

綱目一書非惟分註非朱子手定卽正綱亦多

出趙師淵手併證劉友益誤以晚年未定之本

爲中年已定之本遂不求端訛末強辨誣真其
續麟二十卷則案原書次第摘列綱目及考異
書法發明考證之文而一一辨正其是非彙覽
三卷則列增刪正綱者三千六百四十餘字增
刪分注者四百四十餘字蓋彙覽爲改正之本
而續麟則發明改正之所以然分注之文彙覽
僅改其年號君名諡號之類而其他所當改者
以其文太繁則散見於續麟中蓋二書詳略互
見相輔爲用者也其宗方孝孺之論不以統予
秦晉隋未免儒生膠固之見然其他參互比較

每能推其致誤之所以然如唐以前太子卽位
皆書名至唐獨不書名劉友益曲爲之說自勲
則以爲太子卽位前史皆書名至唐書本紀獨
不書名綱目不過誤從史文不必強爲穿鑿又
如漢景帝中元年十二月晦日食綱目漏書三
年九月晦日食旣綱目漏書旣字自勲以爲皆
漢書本紀先漏綱目但據本紀而未見五行志
故有此失別無他義皆足破陋儒附會之說他
若唐太宗貞觀元年書徵隋祕書監劉子翼不
至劉友益書法稱書不至何美子翼也尹起莘

發明亦以特書隋官爲美之自勲則據唐書劉
禕之傳載于翼後復召拜吳王府功曹參軍終
著作郎宏文館直學士謂綱目失考誤以爲陶
潛一例如是之類其說皆鑿鑿有徵非故與朱
子爲難者比至於凡例稱曹丕劉裕書姓而綱
目書宋王裕乃無劉字又凡例稱宦者封爵皆
加宦者字如鄭衆之屬而綱目書鄭衆封鄭鄉
侯乃無宦者字用證綱目傳寫刊刻不免譌脫
不必以鈔胥刻工之失執爲朱子之筆削尤爲
洞悉事理之言視徒博尊朱子之名而牽合迂

謬反晦朱子之本旨者相去遠矣

綱目雖繼春秋而作然未盡合春秋之旨余輒引義增刪并爲更定凡三千六百四十餘字義詳續麟辭載彙覽識者合觀之可也分註不能悉載惟歲首年

號君名諡號間爲訂正計四百四十餘字

秦晉隋並從分註不

復大書

姑據彙覽所載餘見續麟者不盡錄後有好古

者合全書整理循例增損亦易爲力雖然春秋以制科取士幸得不廢綱目雖存往往束之高閣卽分註尙未寓目況大書乎又況大書之褒貶是非不能無謬戾者乎余雖爲續麟將求爲綱目不可得安望其與春秋并垂哉雖然劉氏之書法伊氏之發明汪氏

徐氏之考異考證猶得與綱目並列則如續麟者後
世或有取焉余非好爲紛更然每覽一書凡心所未
安不能不形諸筆墨姑以盡吾心而已道不終泯應
有昭著之日直俟之耳丙辰蒲節前一日張自勲識

歲乙未予主講昌黎書院就張氏借卓庵綱目續麟
讀之附識數語還其家欲謀梓以行世未果也閱今
二十年復來袁乃得爲之序曰通鑑綱目學史者宗
之皆以爲朱子作而不知非也嘗攷朱子當日命門
人趙師淵輯綱目而師淵史學旣非所長文義亦未
精心是以疎舛不一朱子自序亦云輒與同志因司
馬溫公胡文定諸書增損成篇然則綱目非朱子手
纂確然而無疑而世儒不察比之孔子作春秋過矣
夫春秋之作筆削嚴於袞斧雖游夏不能贊一辭後
之作史者不盡旣乎道而欲上擬聖經不其難乎元

儒汪克寬輩多病綱目之脫誤且與春秋義例不符
然未有起而正之者非以書之卷帙浩繁未易率爾
論定歟宜春張卓庵奮乎數百年之後不顧世之驚
笑竭一生之力於綱目凡增益更改刪除無一不衷
諸大義亦曾與其兄芑山相辨正學者得此書以讀
綱目心開而目爽無復往時脫誤之疑義例之失卽
謂卓庵爲朱子功臣而續春秋之一脉可也我皇
上四庫全書網羅散佚江右收錄者經類則朱可亭
晏一齋史類則張卓庵是卓庵以一布衣隱然與相
國中丞名望若鼎立古學之可貴如是夫乾隆五十

九年甲寅仲春月奉新徐日都

外

外

外

外

外

附錄

黃清河題目耕徐先生有感末章詩後

蓋惜張卓庵綱目續麟彙

覽諸書無人刊行也

南廟山水佳秀氣鬱多士一門得三張季也尤挺峙
抱遺究始終微言慨誰嗣畢精綱目中發憤干戈裏
綜覈貫諸家折衷歸一是考亭有功臣尼山傳嫡隨
正統辨閏餘名分正朱紫碩學人所棄名不出鄉里
埋沒百餘年聲價欻然起曾副 天子求未懸咸陽
市徐君好古癖一見劇狂喜錄要手爲牋那顧旁人
訾舊本還其家深情寄餘紙從君徵文獻向予口先

多鈔畢閱廿載寶書知完否近出感懷詩蓄念倍難
已我雖未見書上下心勞矣緬惟聖作初舊文本魯
史游夏贊不能高赤傳奚似應從廣大心精微該條
理慨自馬班來良穢安足紀均於道無聞具官筆浪
泚溫國君子哉通鑑晞前軌體近史通子事託分晉
始紀周遺孫樵帝魏昧鑿齒仰鑽誠已殫牴牾尙如
此晦庵大正之述古思竊比用力值弩末成書由弟
子遂昌大布衣發明究厥指王劉遞推衍遺蘊更有
俟卓庵後來雄續麟言非侈斬不謬聖人匪集前賢
矢筆舌奮褒誅直道泯譽毀弓冶未盡墜可矣門如

水誰爲發幽潛其責在後死倘得就汗青猶能刊亥
豕難兄念芑山等身書莫恃孰假正字通未可嗤廖
氏若非太守力亦同塵蠹委收骨廬山邊故人誼猶
美法盛盜郤書吾黨固所恥懼其日散亡力薄亦徒
爾安得君百輩一破吝與鄙快覩炳日星附名垂千
祀

徐曰都次韻和黃明府

考亭創綱目衣被後來士意在續春秋遷固肯鼎峙
繁重難獨支義例孰能嗣通鑑讀已稀况復窮表裏
我昔覽斯編美刺惟其是豈第正統分持論得真髓